

Oleh : Syarimie Wosley

Gambar : Al Azam Razi

 www.umk.edu.my

PUSAT SUMBER KEUSAHAWANAN UMK JADI RUJUKAN USAHAWAN



KEJAYAAN Universiti Malaysia Kelantan (UMK) membangunkan Pusat Sumber Keusahawanan atau dikenali sebagai Entrepreneurial Resource Centre (ERC) secara komprehensif kini mendapat perhatian seluruh negara dan dunia apabila menjadi rujukan penting khususnya dalam bidang pendidikan keusahawanan.

Ketua Pustakawan UMK, YBrs. En. Azman bin Hashim, berkata, sehingga kini, pihak Pejabat Perpustakaan dan Pengurusan Ilmu UMK sudah mengumpul lebih 50 koleksi penerbitan keusahawanan termasuk 526 beberapa koleksi jurnal penyelidikan serta koleksi kertas seminar daripada pelbagai tajuk.

Tambah beliau, buku dan bahan rujukan yang terdapat di Pusat Sumber Keusahawanan ini adalah daripada sumber bahan terpilih dan eksklusif yang tidak terdapat di mana-mana perpustakaan di negara ini serta dimiliki oleh universiti lain.

"Antara koleksi tersebut adalah buku bertajuk *Frontier Of Entrepreneur Research* yang diperoleh daripada Babson College yang merupakan koleksi peribadi sebuah institut keusahawanan tersohor di peringkat antarabangsa.



"Menerusi ERC ini, kita berjaya memiliki koleksi-koleksi yang diiktiraf di peringkat antarabangsa. Pelawat luar termasuk pelawat dari Institusi Pengajian Tinggi (IPT) yang lain kagum dengan koleksi keusahawanan yang kita ada sekarang," katanya.

Beliau berkata demikian kepada pemberita pada Program Chief Librarian Talk Series II, 2014, yang dirasmikan oleh Naib Canselor UMK, YBhg. Prof. Datuk Dr. Raduan bin Hj. Che Rose, di Holiday Villa Hotel & Suites, Kota Bharu, Kelantan, pada 15 Jun 2014.

Turut hadir, Timbalan Naib Canselor (Akademik dan Antarabangsa), YBhg. Prof. Dr. Roselina binti Ahmad Saufi, Timbalan Pengarah Pusat Permodalan Insan Bank Negara Malaysia, YBrs. En. Ghazali bin Mohamed Fadzil, Ketua Pustakawan Universiti Sains Malaysia (USM), En. Mohd Pisol bin Ghazali dan Ketua Pustakawan Perdana Leadership Foundation, En. Azahar bin Mohd Noor.

Tambah En. Azman, usaha mengumpul bahan-bahan keusahawanan itu bermula sejak 2008, memandangkan UMK adalah sebuah universiti yang berteraskan keusahawanan.

"Koleksi buku ini adalah berkaitan tentang bimbingan, khidmat nasihat perniagaan dan pembangunan profesional yang bermanfaat untuk rujukan usahawan, mahasiswa dan pensyarah," jelas beliau.

Sementara itu, En. Azman memberitahu program Chief Librarian Talk Series II, sebenarnya adalah program perkongsian ilmu melalui ceramah yang disampaikan oleh Ketua-Ketua Pustakawan yang terdapat di negara ini bertujuan untuk memberi pendedahan tentang cabaran terkini dalam pengurusan perpustakaan dan pengurusan ilmu.



Menurut beliau, program ini akan diadakan berterusan secara bersiri bagi memastikan sebanyak mungkin ilmu yang tersemat di pemikiran semua Ketua Pustakawan untuk dikongsi bersama-sama peserta dan pentadbir di seluruh perpustakaan di negara ini.

"Pada program ini, peserta turut mendapat ilmu mengenai cabaran dunia perpustakaan pada masa kini, yang memberi fokus kepada elemen penting di dalam memastikan kelestarian perpustakaan akademik iaitu dengan membuat jaringan kerjasama dengan organisasi luar yang boleh memberikan impak kepada komuniti perpustakaan dan komuniti masyarakat.



"Pihak kami berharap, program CLTS 2014 yang bertemakan Library Or Knowledge Management ini dapat memberikan manfaat kepada peserta tentang isu, peluang dan cabaran yang telah dan bakal dihadapi oleh perpustakaan akademik untuk terus berdaya saing," katanya.

